

欽定平定教匪紀略

欽定平定教匪紀畧卷九

十月初三日

丙申

上頒示

硃筆報

天恩肅吏治修武備諭曰

天佑我國家迅雷除賊大逆立擒鎗斃踰垣之盜雨熄
舉火之謀餘黨全誅無一倖免朕遭非常之大變

欽定四庫全書
卷九
受非常之

天恩驚懼之餘益深乾惕敬同內外諸臣洗心滌慮盡
心盡職仰答

昊慈以迓承平之福念茲毋忽予之至願也奸民以教
誘人邪說充塞積有年矣直隸山東河南自督撫
至州縣豈盡聳聳乎緣私心太重以致吏治不肅
也大吏待屬員明以奔競爲才能暗以苞苴定高

下週一公務彼此推諉各顧處分上下廻護所辦
無實政所議皆游辭良知泯而利心深戀人爵而
輕天爵小事吹毛以求疵大事養癰而貽患叢脞
疲玩怠惰因循吏治之壞至今極矣逆賊竊視官
庸吏玩至於如此有何畏憚顧忌乎始則歛錢聚
衆官吏不辦終則揭竿肆逆官吏不知若非

天佑尙可言哉朕無知人之明乏馭世之才屢申勸誠

徒費苦心依違遷就習與性成事前則漫無覺察
臨事則張皇失措事後仍漠不關心皆朕不德之
所致也諸臣各勉致君澤民揚名後世切勿視此
殊諭又不領會相率頌揚具摺了事真不知朕之
苦心矣九重臯應何等尊嚴八旗守衛何等雄壯
豈有數十逆賊哄然直進官兵空手遮攔立被殺
害皆由經年累月不修軍器弓無弦矢無鏃刀鎗

鈍敝火藥潮濕日前擊賊皆用瓦礫言之可羞軍
威不振毫無紀律此皆管兵大臣之咎亦朕誤用
人之過也逆賊盤踞京畿伏藏禁闈官吏廢弛兵
丁怠惰軍器無用皆見慣之事是以大逆林清自
六月至九月毫無顧慮公然布置勾結爲奸竟無
一人舉發誠怪誕之極矣近日言事諸臣可採用
者立見施行留中不報者實不可行者也若顯斥

其非又以朕爲拒諫爲君難至朕尤難爲臣不易
諸臣未必能留意體會亦太覺容易矣惟祈

上天啟迪渺躬用股肱心膂之臣同心協力挽回汚俗
庶幾補咎於萬一耳特諭

臣等謹案安危治亂至無定也以爲易而難
者至矣以爲難而易者至矣我

皇上宵旰勤求思艱圖易綢繆未雨惕若乾乾如戒

吏職之因循懲武備之廢弛慮奸民之萌孽
杜邪說之蔓延臣等祇稟

訓言敬宣

謨誥所以

申儆在位者殆無虛日而邪說不除潛滋暗長奸徒

乘機搆煽內外竊發始猶匿跡潛蹤繼且明

目張膽其所以毫無忌憚者何哉彼固知官

司憤憤無有能覺察之人而軍實不修緩急
間更無可恃也內外文武諸臣食祿於

朝豈不聞忠

君事

上之義顧乃尸位曠職盡成庸碌者其弊在於悠悠
忽忽不知圖治之難相率易視而已伏讀

殊諭明克艱之理揭制治之源

熙績亮工責之以股肱心膂之效孰敢不遵釋體會
痛自湔改以振刷其因循與

是日溫承惠奏言

臣

於九月二十九日行抵開

州查開州相距河南濬滑均不及百里連日探
得山東定陶曹縣一帶賊匪約不過千餘名欲
奔赴河南其豫省賊匪仍距滑縣城內並於老
安集挖濠固守濬縣道口一帶賊勢亦衆臣前

調官兵五千名除撥赴長垣東明守城六百名
外其餘四千四百名現在約計十月初一二日
可到其糧運軍火鍋帳亦約于初二三可齊

臣

卽與馬瑜等帶兵由濬縣一帶與高杞合兵剿
捕其續調提標官兵六百名同續調宣化鎮兵
一千五百名留資後路防範查山西潞澤所屬
壺關鳳臺陵川一帶山徑正與濬滑兩縣緊接

臣先經札商山西巡撫衡齡派兵一千名聽候調撥防堵仰祈

皇上勅下衡齡遵辦奏入

上命軍機大臣傳諭溫承惠曰豫省賊匪雖經高杞等連獲勝仗而賊勢尙衆且山東定陶曹縣一帶之賊亦欲奔赴河南必須趕緊痛剿迅挫賊鋒此時該逆屯踞滑縣城內並於老安集挖濠固守看

來賊衆並無智慮祇圖苟延殘喘該督等將分屯
道口桃源兩股之賊一經剿殺勢必奔聚一處正
如釜魚阱獸自投絕地乃是我兵極好機會溫承
惠所調之兵據奏本月初一二日可到齊四千四
百名足敷進剿計刻下該督正與高杞會合進兵
剿捕一戰成功朕竚待捷音之至溫承惠得有勝
仗卽於訊取賊供時確查賊匪實在共有若干不

可以少報多亦不可以多報少彼時朕洞悉賊情
各路續調之兵應行應止另有裁酌該督此時惟
當一意剿賊迅速進攻期於滅此朝食

十月初四日酉

上諭內閣曰國家修明武備禁暴戢奸必平日紀律
嚴明器械堅利方足稱干城之用近因承平日久
漸就廢弛卒伍旣多怯懦軍器敝壞相仍一有緩

急備禦全不足恃卽如前月十五日賊匪突入禁
門者僅止數十人各處守門官兵不能立時擒捕
甚至各門所備弓箭刀矛全係飾觀不堪應用尤
爲可詫夫慎簡軍實器械爲先全在鋒鋦堅利方
能殺敵致果卽壯勇兵丁亦不能以徒手搏賊况
恇怯之人加以朽敝之器何怪其臨事倉皇乎軍
政若此不可不亟加整飭著兩翼前鋒統領八旗

護軍統領將紫禁城內例設各項軍器逐一查點
可用者若干應行修理補造者若干其各城門及
各堆撥例設軍器並各營應用軍器交八旗都統
副都統步軍統領及管理圓明園暨火器健銳營
大臣等一體確查據實具奏至遲在本月二十日
之外若遲延推諉耽擱不辦自行摘去翎頂議罪
具奏朕另簡賢臣辦理不患無人也並著武備院

先查明該院現存各項軍器共有若干開單具奏
所有各處軍器殘缺不全者先將該院現存軍器
撥補再有不敷動項製造各該管大臣不得以籌
款爲詞遷延時日俟彙齊交工部等衙門確核需
項若干奏上朕發帑飭修勒限報完另派大員前
往查驗如有製造不精通融短缺等弊必將該管
大臣從重治罪各禁門經朕常時出入或間一抽

驗察有弊端該管之員難逃重譴軍械既全管理
營務各大臣以時認真訓練務令步伐整嚴將士
相習庶軍政修明克副有備無患之意

是日貢楚克扎布奏言

臣欽遵

諭旨籌辦馬匹遵卽飛飭商都達布遜諾爾太僕寺
馬羣總管挑選臚壯馬四千餘匹定於十月初
六七日到口一俟到時臣同來靈詳加挑選將

臚壯者二千匹先行押送進京計本月十九二十等日可到吉林黑龍江兩處官兵過京足資更換此外並多選馬一百匹亦交該總管押送赴京預備挑補其餘馬二千匹於張家口外附近牧放倘有需用之處令其迅速進京不致貽誤至馬匹到京後等候官兵應請

勅下戶部照例支給馬乾俾資喂養奏入

上命軍機大臣傳諭貢楚克扎布曰此項馬匹前日
續又降旨令貢楚克扎布先擇臚壯者二千匹解
赴保定交與總督章煦點驗收明該都統卽將先
解京之馬二千匹飭令速交保定其餘二千匹該
都統令於張家口外暫行牧放俟吉林黑龍江官
兵將次到京之先候旨調取

上又命軍機大臣傳諭章煦曰本日貢楚克扎布奏

到遵旨籌辦馬匹一摺已降旨飭令先挑臃壯者二千匹卽日解往保定此項馬匹係備吉林黑龍江官兵乘騎打仗之用該官兵由本處起身已令在大凌河換馬一次到京時又已更換一次經由良鄉保定一路馬力足敷不致疲乏所有解到保定之察哈爾馬二千匹著章煦收明後酌量情形派妥員解往正定以南至順德一帶妥爲喂養務

須加意防範不致疎失以便官兵到彼更換馳赴
軍營自更得力

十月初五日

戊戌

衡齡奏言伏查山西潞安澤州

二府屬與河南匪徒滋擾地方接壤臣恐有逃

匪竄入當經飭派巡防臣於九月二十九日先

准溫承惠札稱豫省拏獲匪犯據供有現欲入

山之語囑令派兵防堵臣當卽飛咨太原鎮臣

祥泰派撥太原營兵四百名分駐各隘口實力
防範並添派將備會同潞安澤州二營及該府
縣分投照料其山僻小路俱用石塊樹枝層層
堵塞仍酌撥兵役防守其餘緊要大口十餘處
每處兵役民壯已有百數十名及二百名不等
並經札致鎮臣祥泰暫駐澤州府督率巡防茲
臣接奉

諭旨遵卽飛咨大同鎮臣張績於該鎮所屬各營內
選派弁兵一千名速赴太行山外與河南接界
扼要處所駐劄如有賊匪闖入卽迎頭剿擊盡
力防堵不使一名竄入奏入

上命軍機大臣傳諭那彥成曰連日據各處奏報賊
匪尙屯聚潞滑地方現在各路官兵漸次逼近恐
賊匪被剿情急向太行山一帶奔竄若賊匪竄入

山內則搜捕又需時日已降旨令大同鎮總兵張
績帶兵在澤潞山外堵截那彥成由潼關一路進
發途次探有賊匪西竄之信卽迎頭剿擊毋任蔓
延其富僧德所帶西安官兵亦著飭令迅速馳赴
河北揚言大兵西來使賊不敢西竄並傳諭富僧
德知之

上又命軍機大臣傳諭衡齡曰豫省賊匪屯聚潞滑

一帶據高杞奏報連次多有殲獲現在溫承惠督率大兵會合進剿恐賊匪被剿情急亡命奔竄入山著銜齡再飛催張績帶兵星夜馳赴太行山外河南接界扼要處所駐劄探明何處有賊匪竄近卽迎頭剿擊勿稍疎虞

上又命軍機大臣傳諭章煦曰昨據軍機大臣會同刑部訊出逆犯祝現於十五日滋事後逃回桑堡

村十六日晚同劉進財卽劉喜兒裹帶乾糧出沙河一路向東逃走該逆等與滑縣匪徒聲勢勾結想必潛逃彼處但河南距京千餘里該逆中途乏食或仍在直隸境內潛藏伏匿亦未可定又劉第五亦係要犯至今尙未得其實在下落著章煦遴派妥員並密飭各地方官留心查緝毋任遁逸過境又滑縣曹單匪徒知林清破案難保不潛遁夥

黨來京探信其鬼蜮伎倆慮人知覺必不肯成羣
行走大約改扮裝服晝伏夜動三兩潛行該署督
並飭知沿途地方官密派兵役逐處盤詰一有弋
獲之犯訊錄供詞迅速具奏再昨經降旨將察哈
爾馬二千匹解赴保定交章煦派員轉送正定順
德一帶喂養待吉林黑龍江官兵到彼更換乘騎
但思章煦所派不過文員數人帶領馬夫長途押

送省南距大名漸近設有賊匪詭謀前來刼探亦
不可不防現派候補總兵劉榮慶馳赴保定著章
煦預挑壯健兵丁百餘名俟馬匹到省時交劉榮
慶帶兵押送前往飭令該總兵沿途小心防範俟
吉林黑龍江官兵路過順德一帶將馬匹給與更
換該總兵卽隨同末隊馳赴軍營効力聽候差委

同日胡克家奏言竊

臣

於九月二十三日欽奉

諭旨據逆犯林清供稱有坤卦頭目魏正中在安慶傳教著嚴拏務獲等因查匪犯魏正中潛匿皖境亟應剋期拏獲當卽選派妥幹員弁改裝易服分赴安慶所屬嚴密偵查該匪如有抗拒情事卽行派兵撲滅不任竄逸勾結別滋事端臣日內行近災區竊思安撫窮黎與防守邊界均關緊要臣現由潁上徑趨亳州查勘撫卹查亳州

與河南鹿邑等縣接壤蒙城雖居腹裏亦屬要地太和阜陽霍邱三縣亦與沈邱新蔡項城固始等縣毗連道里遼濶必須扼要分防現今署壽春鎮臣陳均將所帶防兵在亳州蒙城太和三處駐紮聯絡聲勢其阜陽霍邱卽在潁州營酌量抽調並令各該縣團練鄉勇協同守禦臣布置停妥卽馳赴宿州查該處距豫東甚近兵

力單薄臣先經飛調遊兵營兵二百名調池州
營都司魏光德統領星赴協防足資防守奏入
報

聞

十月初六日臣同興奏言竊九月二十七日劉
清馬建紀等將定陶附近賊匪剿敗之後臣連
日探知韓家大廟馬家集兩處屯聚賊匪約有

五六百人其餘附近小莊亦有藏匪隨飭該員等約定三面進兵都司周添章帶兵自南迎擊劉清馬建紀等分帶馬步軍士由北兜轉分路進攻賊匪見官兵掩至蜂擁抗迎馬隊首先衝出繼以鎗箭弁兵奮勇爭先立即殲除在前賊匪百餘人賊衆奔潰官兵四路追剿共斃賊匪四百餘人生擒十餘名隨即揀派滿漢奮勇官

兵六百餘名分爲兩隊於三十日五鼓統領前進將韓家大廟四面圍定先派馬隊衝突入莊繼派步隊次第前進按戶搜尋共拏獲賊匪一百八十餘名又於村外拏獲該處教首趙文祿一犯審明分別正法據臣派往飭查之備弁回稱該逆匪並無紀律亦無技勇間有馬匹亦不能馳驟一經官兵發喊卽時驚墮其被脅之人

一見官兵卽將刀仗拋棄拚命奔逃並有脫衣
跪地者現在剿殘零匪俱逃往曹縣之扈家集
等語又據兗沂曹濟道熊方受稟稱是日亦帶
領兵役於曹縣城外搜獲賊匪六名內有蔡五
言一犯係著名逆匪蔡五倫之弟據供蔡五倫
因糾約人衆不齊已潛奔滑縣又據鄉民王世
俊趙第二拏獲蕭保卽僞號蕭二大王一犯

臣

連夜究問實係定曹滋事後在蕭家廟當家之
首逆均卽分別正法查扈家集毗連之處尙有
安陵集乃直隸東明山東曹縣菏澤三處交界
之所探問該處藏賊不少距曹州府城僅四十
里臣當派遊擊五達色帶馬兵三十名發給解
散脅從並懸賞購賊告示數十張帶往粘貼藉
以偵探據五達色回稱馳抵該處見係土堡周

圍約五六里舊有四門俱係缺口並無門扇已
用荆棘堵塞不能進入居人在內呼之不出該
遊擊隨將告示擲給而回旁有小阜登望見牆
內站立之人甚多是否賊匪無從辨認附集一
帶小村多有被燒之處問之居民俱有懼色不
敢指實看其情形自係由定陶韓家大廟馬家
集一帶逃伏於此者現在四面有兵該匪等必

不敢大夥竄出趁此聚匿之時正可設法辦理

臣現已密札溫承惠卽派員自東明由西北向

東南又派定陶之兵由東向西臣自曹州督兵

自東北向西南約定日期一鼓攻圍卽可撲滅

現在曹屬荷澤定陶曹縣鉅野鄆城單縣城武

濮州觀城朝城范縣等十一州縣臣先已按其

遠近形勢各派兵一二百名屯劄並令該州縣

添雇民夫協同防守鉅野及濟寧金鄉派出尤
多是以賊匪在曹定一帶村莊聚集不敢向東
奔竄今曹定二處巢穴已破脅從潰散官兵再
不予以暇趕緊搜捕實不難計日肅清惟官兵
每出無不大勝臣深恐將士驕慢輕視若偶一
失利則賊膽又壯現在時刻訓誡務令謹守
戒懼二字俾軍威丕振羣匪落魄至旬日內除

陣前伏誅者不計外各處兵役捕拏之教匪盤
獲之奸細及鄉民縛送之匪徒已有四百數十
人金鄉一縣卽有一百三十一名之多臣均核
其情節輕重分別辦理奏入

上諭內閣曰東省賊匪在定陶城外之韓家大廟等
處屯聚同興派運司劉清叅將馬建紀分路進兵
賊匪蜂擁抗拒官兵奮勇爭先將在前百餘人悉

加殲戮賊匪奔潰復經四路追剿共誅賊匪四百
餘名劉清馬建紀二人復探明賊巢所在統領滿
漢官兵鼓勇前進四面圍定馬隊先行衝入步隊
繼進又搜獲賊匪一百八十餘名均在該處正法
並拏獲教首趙文祿及僞號蕭二大王卽蕭保一
併轡割示衆現在官兵乘勝逼向西南卽日與直
隸官兵會齊將餘匪一鼓殲除所辦甚好劉清前

在川省剿辦邪匪勇敢出力朕所素知現在年逾
六旬尙能率領將士親歷行間連獲勝仗實屬奮
勇可嘉叅將馬建紀當先剿賊奮勉出力劉清馬
建紀俱著交部議敘馬建紀若未經賞戴花翎著
加恩賞給同興督率有方亦著交部議敘

上又命軍機大臣傳諭同興曰同興奏賊匪等現當
被剿情急赴村莊聚匿該撫已密札溫承惠令其

派兵自東明由西北向東南定陶之兵由東向西
該撫自曹州督兵由東北向西南約定日期爲一
鼓攻圍之計所辦甚合機宜該匪經官兵四面兜
圍釜底游魂諒不難剋期掃蕩該撫當督率將弁
奮勇爭先如能將境內賊匪就地殲除不令四散
蔓延捷音奏至必當優予恩施其所奏安陵集藏
賊不少差弁查探土堡居人甚多是否賊匪無從

辨認此一節該撫務須詳慎辨明村堡內聚處之人如係真正賊匪正可聚而殲旃不留遺孽若係逃避難民守堡自衛則斷不可冒昧誅戮剿賊以安人心爲先此事關係甚重切勿輕率再此次滋事逆匪內李文成徐安幟二犯最爲首逆該撫於進剿時必須留心查緝如能擒獲盡法處治更足以彰國法而快人心此外尙有突入禁門滋事逆

犯祝現一名現據訊明該逆於十五日滋事逃回桑堡村十六日晚同劉進財由沙河一路向東逃走該逆或潛赴東省投其夥黨亦未可定又劉第五一名亦係要犯至今未得實在下落著該撫一體飭知沿途州縣官留心查拏就獲速奏

十月初七日

庚子

溫承惠馬瑜奏言

臣

等於十月

初二日調齊官兵四千二百名適接高杞知會

匪徒連次撲營雖用鎗礮擊退而賊衆兵單不能進剿現在道口桃源滑縣城內及老安集等處賊匪屯集甚多臣等自當速赴豫省先與高杞會剿濬縣之賊再行收復滑縣查濬縣在開州之西滑縣在開州之南相去均九十里而地形犬牙相錯由開州赴濬城西二十餘里卽交滑縣地界臣等公同商酌必須顧衛直隸邊境

由東北向西南攻剿以防入山隨於初三日由
北台西至滑縣留固村該村北有沙窩障蔽匪
徒便於潛藏臣等一面探哨前進當經擒獲賊
探一名詢知該村果有匪徒二百餘人而迤西
之梁莊集惡虎寨新寨均有匪徒數百人潛伏
又西南七八里北湖南湖爲匪徒巢穴臣等卽
先赴留固村搜剿詎該匪公然抗拒我兵截住

該村兩頭擲放火彈鎗箭齊發殺賊二百餘名
生擒二十餘名並無漏網因思梁莊惡虎寨新
寨三處相距均不及十里賊勢聯絡若不分兵
進剿恐賊匪彼此應援臣溫承惠隨囑馬瑜侍
衛額勒精額等及宣化鎮總兵音登額分兵赴
惡虎寨護軍統領富蘭侍衛伊勒通阿等分兵
赴新寨臣溫承惠督同侍衛蘇倫保副將舒凌

阿等赴梁莊乘賊匪不及會合同時並集官兵
奮勇當先殺賊七八十名至百餘名不等餘匪
四散奔竄復查該一帶村內南湖北湖聚賊較
衆兩村相距三里不可不乘勝剪除復合兵一
處往南湖北湖進剿臣馬瑜等由村南富蘭等
由村北先行抄入臣溫承惠由中路繼進該匪
膽敢用大礮拒敵分路直前衝突我兵奮力截

殺愈形勇健又殲斃賊匪五百餘名共殺賊八百餘名生擒一百餘名除係被脅良民及婦女當卽釋放外其餘訊非著名頭目當卽正法奪獲大礮一尊鳥鎗二桿器械旗幟無數賊匪約有千餘人四散南竄時已昏暮官兵或分或合已接仗六次轉戰二十餘里未便再行窮追隨卽收兵於附近牡丹衛地方紮營查點陣亡兵

丁二名受傷兵丁七名分別卹賞調養現探得
陰陽鋪下高村二郎廟一帶均有賊匪臣仍由
西北向東南知會高杞兩面夾擊俟續獲勝仗
再行奏報奏入

上命軍機大臣傳諭溫承惠曰溫承惠於本月初二
日調齊官兵統兵前進於初三日至滑縣留固村
地方先往搜剿殺賊二百餘名生擒二十餘名無

一漏網旋又查知該處附近梁莊惡虎寨新寨三處各有匪徒潛伏隨分兵進發將三處賊匪剿殺七八十名至百餘名不等又南湖北湖兩村爲賊衆大股屯聚之處該督復與馬瑜等合兵會剿斃賊五百餘名奪獲大礮鳥鎗器械旗幟無數餘匪四散南潰賊匪等屯聚莊村分投盤踞與滑縣之賊互相應援溫承惠一入豫境沿途轉戰二十餘

里殲賊八百餘名生擒一百餘名初次進兵卽能
得此勝仗軍威已振事機甚爲順利看來賊匪詭
謀多於沿途村莊埋伏大兵若直搗滑城賊巢則
匪徒抄襲後路以圖牽制溫承惠現由西北向東
南進發其開州東明長垣所屬各村莊恐伏賊尙
未能淨盡該督所統帶兵大員不少當一面嚴防
後路一面帥師前進務使前後有備軍火糧餉不

虞抄襲則乘勝轉戰而前不過數日即可將賊匪
逼歸一處一鼓殄除計該督奏報後又已三日高
杞接到該督知會自己帶兵迎堵兩面夾擊必當
大獲勝仗竚待捷音之至再摺內稱奪獲賊匪大
礮一尊賊營內何由得此大礮有無鑄造年月及
安設營分著查明附便具奏此次陣亡兵丁二名
及受傷之兵均著咨部卹賞

上又命軍機大臣傳諭那彥成曰前據台斐音奏報
九月十六日督率官兵將濬縣賊匪殲擒一千餘
名嗣高杞於二十二二十六兩次又殲擒賊匪一
千餘名據同興奏報二十七三十等日派運使劉
清叅將馬建紀兩次殲擒曹定賊匪八九百名搜
獲藏匿賊匪一百八十餘名本日據溫承惠奏由
開州進兵於濬縣留固村及北湖南湖一帶剿殺

賊匪八百餘名生擒一百餘名官兵已連獲勝仗
各處賊匪俱已披靡現在溫承惠在北高杞在南
同興在東三面夾擊以漸逼近期爲一鼓殲除之
計惟西面無重兵堵遏恐賊被剿情急亡命西竄
太行山搜剿致需時日那彥成帶兵由潼關而來
沿途差探賊蹤如有西竄之信卽擇路迎頭截擊
不可令其四散蔓延高杞軍營近在西南一面如

高杞軍營緊要那彥成卽先與高杞會合再知照
溫承惠接受欽差大臣關防而傳諭旨令溫承惠
專辦軍火糧餉及撫卹難民事宜那彥成接印後
督率將士將河南山東直隸三省交界之處所有
滋事賊匪全數殄平各路大兵凱撤再行來京聽
候擢用

同日

上諭內閣曰近日查緝禁城滋事匪犯業已捕獲殆盡間有一二匪犯祇須購線查拏所有紫禁城內外及九門暫設官兵應如何酌撤之處著軍機大臣會同內務府大臣步軍統領管理火器營大臣速議具奏

十月初八日

辛丑

上命軍機大臣傳諭欽差大臣那彥成直隸總督溫

承惠曰那彥成兼程行走刻下自己馳抵衛輝溫
承惠現已帶兵前赴濬滑計日內即可會面此次
剿辦逆匪由京揀發健銳火器兩營滿洲官兵一
千名帶兵之人多係滿洲大員及吉林黑龍江侍
衛章京等俱不諳漢話溫承惠係直隸總督恐調
遣約束不能得力那彥成現賞加都統銜本屬京
職且係滿洲大員諳習清語著接受欽差大臣關

防總統軍務溫承惠昨由滑縣進兵業已得有勝
仗辦理尙好著溫承惠馬瑜楊遇春俱同在那彥
成軍營會同商辦軍務那彥成分屬總統溫承惠
馬瑜楊遇春俱職同叅贊所有奏報之摺著那彥
成溫承惠馬瑜楊遇春四人一同列銜溫承惠等
及高杞同興並受那彥成節制現在賊匪屢經敗
衄大兵雲集趕緊再接一二仗諒賊勢必已窮蹙

若賊匪亡命奔逃那彥成等卽率兵窮其所向其
開州東明長垣在大兵後路恐餘匪不能淨盡溫
承惠係直隸總督不必隨那彥成深入著於富蘭
等員內酌帶一人並帶領直隸兵一二千名專在
開州一帶嚴防後路就近搜捕零匪並督辦軍火
糧餉及撫卹難民事宜那彥成等督兵前進亦可
無後顧之患再接再仗之時賊匪必係將裹脅難民

驅逐在前而真賊尾隨其後我兵若先用鎗礮轟擊則所傷者皆係難民轉不能將真賊痛加剿戮該大臣等當嚴諭帶兵將領先將難民解散專戮頭裹白巾手持器械之真賊則剿捕不致妄戮無辜而賊勢亦易於摧敗又此次滋事逆匪內李文成徐安幘及牛亮臣馮克善四犯俱係著名首惡不可一名漏網而李文成尤甚斷不可縱放至徐

安撫現在開州附近藏匿必須密訪迅拏著那彥
成等按名擒捕如將該逆等臨陣殲戮必須確有
證據方足爲憑若能生擒弋獲卽擇其受傷較輕
者派乾清門侍衛會同文武員弁嚴密鎖押小心
防範迅速解京預備廷訊當盡法處治以彰國憲
現在兵威已振事機極爲順利那彥成等當同心
協力鼓勵將弁兵丁將匪徒迅卽掃除捷音一至

立沛殊恩勉之望之

是日熱河都統署河南巡撫高杞奏言

臣兩經

督仗深知賊匪恒怯無能不過藉烏合之衆苟

延旦夕現在大股仍屯滑城及道口桃源等處

已屬膽落計窮不敢輕出附近封邱考城及蘭

陽北岸探係剿敗餘匪竄逸紛擾不過數十百

人節經營縣擒戮稟報已爲不少而黃河南岸

間有蠢動之機

臣

查訪近日情形方知係本地

棍徒如紅鬍子之類藉端煽惑地方文武嚴密
防範可期寧謐倘果有竊發之處卽當恪遵

聖訓飛速知會百齡胡克家就近前來剿捕現在溫

承惠一二日內卽可到濟

臣

當與溫承惠等妥

籌全局分投剿堵至馬匹一項昨接溫承惠來

札據稱疲乏應換

臣

當將南北兩鎮及撫標滿

營買回例馬五百餘匹先行截留以應急需再
衛輝郡城實爲南北咽喉一切糧餉軍火由省
城總局運至衛輝分局轉運賊匪屢來窺伺而
西界太行尤當防其竄匿茲湖南綏靖鎮總兵
海麟奏奉

諭旨留豫協剿臣當卽將所調兵內抽撥五百名囑
令海麟於衛輝府城外安營設卡駐劄策應至

衛輝由淇縣宜溝而北爲十省通衢現在道路
肅清商旅寧謐其自宜溝至濬縣軍營計程五
十里尤爲糧運所必經賊匪時有出沒必須分
營駐劄以資控禦臣擬於宜溝至濬縣軍營擇
其要隘之處酌量設立營卡旣可捍衛彰德亦
以防護糧運而大道商旅並得安行無慮奏入
上命軍機大臣傳諭熱河都統高杞河南巡撫方受

疇曰濬滑一帶賊匪經高杞前次剿退後仍分屯
滑城道口桃源三處高杞以兵單未能進剿現在
溫承惠已在滑縣境內獲有勝仗轉戰而前那彥
成亦卽日可抵軍營統兵前進諒賊喘不能久延
高杞本係都統刻下方受疇業已接任該都統專
辦剿賊之事著探明那彥成等何日進兵卽率領
豫省將弁前往會剿以冀速成大功其豫省地方

應辦事件皆本省巡撫之事方受疇日內自己馳抵省城次第辦理其高杞軍營後路軍火糧餉以及撫卹災黎並沿河防守等事方受疇責無旁貸當督同台斐音等認真經理至黃河南岸間有土棍紅鬍子之類乘機煽惑務飭知地方文武各官嚴密防範倘有竊發高杞遠在北岸不能兼顧該撫卽就近督兵擒捕並知會百齡胡克家合力堵

禦其高杞所稱衛輝有糧餉總局且城外西界太行總兵海麟帶兵五百名防守並於宜溝要隘設立卡營以護糧運之處所辦俱合機宜著飭知該總兵等嚴密守備

同日

上諭內閣曰現在天氣漸寒所有查緝禁城滋事匪徒業已捕獲殆盡其紫禁城內外原留內火器營

兵一千名著暫留四百名在午門東華門西華門
神武門四處幫同該班護軍等防守稽查每門內
外各派五十名輪班宿衛其餘六百名俱著撤歸
原營

是日董誥等會同內務府等衙門遵

旨議奏請將京城九門原添護軍驍騎等營兵先行
酌減四百五十名其餘四百五十名同

禁城四門

景運門

隆宗門

蒼震門

啟祥門

順貞門

永康左門

三所正門所添上三旗內務府護軍共一百十名
均暫留守護俟來歲春融一體裁撤其現在暫
留之內火器營兵四百名屆時一體同撤奏入
上從之